

## Evening Dogri News

25<sup>th</sup> May 2024

1815 hrs

### Headlines

- 1 लोकसभा चुनाव दे 6में गेड़ तैहत देसै दे 58एं पार्लिमानी हल्के च वोट पाए गे। दपैहरीं मगरा 1 बजे तगर 39 फीसद मतदान दर्ज कीता गेआ।
- 2 जम्मू कश्मीर दे अनंतनाग-राजौरी संसदीय चुनाव हल्के च बी अज्ज 6में गेड़ दे लोकसभा चुनाव तैहत वोट पाए गे। दपैहरी मगरा 3 बजे तोड़ी 44.88 फीसद मतदान रिकार्ड कीता गेआ।
- 3 जम्मू प्रांतै दे बक्ख-बक्ख हिस्सें च कश्मीरी पंडत विस्थापतें ते मतदान लेई मतदान केन्द्र स्थापत कीते गेदे हे।
- 4 बनिहाल दे उपभोक्ता मामले ते सार्वजनिक बंड-गिक्री आले मैहकमे आस्सेआ बकाया रेहदे उनें लाभार्थिएं आस्तै जिंदा केवाईसी नेई हा होए दा, हुन ई-केवाईसी तैहत उंदिएं अक्खीं दे स्कैन आली प्रक्रिया शुरू कीती गई।

<><><><><><>

### 6<sup>th</sup> Phase

लोकसभा चुनाव दे 6में गेड़ लेई मतदान प्रक्रिया जारी ऐ। इस गेड़ तैहत 6एं राज्यें ते दऊं केन्द्र शासत प्रदेशों दिएं 58 संसदीय हल्के च वोट पाए जा'रदे न। इस गेड़ च बिहार दी 8 सीटें, हरियाणा दी सब्बै 10 सीटें, झारखंड दी 4 सीटें, दिल्ली दी सब्बै 7 सीटें, ओडिशा दी 6 सीटें, उत्तर प्रदेश दी 14 सीटें, पच्छिम बंगाल दी 8 सीटें ते जम्मू कश्मीर दी इक सीट पर मतदान होआ'रदा ऐ। मतदान बडलै 7 बजे थमां शुरू होई गेआ हा ते संजा 6 बजे सम्पन्न होई गेआ ऐ। दपैहरी 1 बजे तगर 39 फीसद थमां बद्ध मतदाता मतदान करी चुके दे न। इस गेड़ च तकरीबन 589 मेदवार चुनाव मैदान च उतरे दे न, जिंदे भविक्ख अज्ज ईवीएम च बंद होई जाग। इंदे च बीजेपी दे बड्डे नेता धर्मेन्द्र प्रधान, मेनका गांधी, मनोहर लाल खट्टर ते मनोज तिवारी ते कांग्रेस नेता दीपेन्द्र सिंह हुड्डा, कुमारी शैलजा, राज बब्बर ते कनैहया कुमार शामिल न। समाजवादी पार्टी थमां धर्मेन्द्र यादव ते पीडीपी दी प्रमुख महबूबा मुफ्ती बी मैदान च न। इस गेड़ तैहत 1 लक्ख 14 जहार मतदान केन्द्रें च 11 करोड़ शा बद्ध मतदाता मतदान करने दे योग्य न। चुनाव आयोग नै रमानदारी ते बवस्था आले ढंगै कनै मतदान करोआने लेई सब्बै लोड़चदे प्रबंध कीते दे न।

<><><><><><>

## Poonch Voting

अज्ज करापेआए गेदे पार्लिमानी चुनाएं च बन्ने आले पुंछ जिले च देगवार तेरवान आले मतदान केन्द्र नंबर 39 च मतदाताएं दी खासी भीड़ दिक्खी गई। बडलै मतदान प्रक्रिया शुरू होने कशा पैहले गै मतदाता मतदान केन्द्रें च लम्पिएं-लम्पिएं रींगें च खड़ोते दे लम्बे। मतदाताएं दा एह जज्बा, भौगोलिक स्थिति करी उनेंगी पेश चुनौतिएं दे बावजूद, लोकतंत्र गी सशस्त्र करने दे उंदे धेइयै गी बांदे करदा ऐ। देगवार तेरवान मतदान केन्द्र बन्ने कन्ने लगदे इलाके च स्थित ऐ जित्थें सुरक्षा दे पुख्ता प्रबंध कीते गेदे हे। मतदाताएं दियां रींगां बड़ी तगड़ेयाई कन्ने एह स्नेहा दिंदियां सेही होआरदियां हियां जे समुदाय नै अपनी आवाज बुलंद करने दी पक्क ध्यायी दी ऐ। स्थानीय प्रशासन ते चुनां अधिकारिएं चुनां प्रक्रिया गी सुरक्षित ते असरदार ढंगै सिर करोआने लेई व्यापक इंतजाम कीते दे हे। बन्ने पर रौहने आले मतदाताएं दी वोट पाने आली प्रक्रिया सखल्ली करने लेई विशेष इंतजाम कीते गेदे हे।



## Polling Percentage

पार्लिमानी चुनाएं दे पिछले 5एं गेड़ें आंगर अनंतनाग-राजौरी संसदीय हल्के च अज्ज करोआए गेदे 6में गेड़ दे चुनाएं च लोके बधी-चढ़ियै शिरकत कीती। अपने जीवन च बदलाव आन्नने लेई मतदान दी महत्ता गी समझदे होई मतदाता सख्त गर्मी दे बावजूद लम्पिएं-लम्पिएं पंगतालें च वोट पाने दे अपने अधिकार दे इस्तेमाल गी निहालदे लम्बे। दपैहरी मगरा 3 बजे तोड़ी जम्मू दे मुख् चुनां अधिकारी हुंदी रिपोर्ट मूजब अनंतनाग-राजौरी पार्लिमानी हल्के च 44.88 फीसद मतदान होई चुके दा हा।



## Rajouri Voting

राजौरी जिले च अनंतनाग-राजौरी लोकसभा नशीस्तें लेई बड़ा मता मतदान होआ। अनंतनाग-राजौरी पार्लिमानी हल्के लेई 6में गेड़ तैहत वोट पाए गे। मतदान प्रक्रिया बडे बवस्था आले ढंगै सिर सम्पन्न होई। लोकवाद दे सिद्धांते पर टुरने दे धेइयै गी होर पक्का करदे होई लोक पूरे उत्साह ते जज्बे कन्ने अपने घरें शा निकलिये मतदान करन आए। मतदान प्रक्रिया च हिस्सा लेंदे'लै पैहली बारी मतदान करा'रदे नोजवानें ते बर्जुर्ग मतदाताएं च खासा जोश दिक्खने गी लम्बा।



## Migrant Voting

विस्थापत कश्मीरी पंडतें राजौरी-अनंतनाग सीट लेई जम्मू च बनाए गेदे पोलिंग बूथें च वोट पाए, जित्थें मतदाताएं दा बड़ा मता रश दिक्खने गी लम्बा। इस दरान मती गिनतरी च कश्मीरी पंडत उदयवाला च स्थापत कीते गेदे पोलिंग बूथ पर बद्ध गिनतरी च मतदान करने लेई पुज्जे। राहत मैहकमे दे कमीशनर अरविंद कारवानी होरें पोलिंग बूथ दा दौरा बी लाया।



## Migrant-Udhampur

अनंतनाग-राजौरी संसदीय चुनाव हल्के दे 626एं कश्मीरी विस्थापत मतदाताएं लेई उधमपुर च मतदान दी सुविधा दे बंदोबस्त कीते गोदे हे। मतदान प्रक्रिया बडलै सवेला बल्ले-बल्लें शुरु होई ते फही तेज होई गोई। संजा साढ़े 4 बजे तगर मतदाता अपना वोट पाई ऐठे दे हे।

<><><><><><>

## FCS Ramban

उपभोक्ता मामलें ते सार्वजनिक बंड सरिस्ते सरबंधी मैहकमे नै जेह्ड़े बायोमैट्रिक दे माध्यम राएं अपनी लाजमी ई-आई नेई करवाई सके हे, उनें छुड़के दे लाभार्थिं दी ई-केवाईसी गी पूरा करने लेई रामबन दे बनिहाल इलाके च बक्खीं गी स्कैन करियै एह सुविधा उपलब्ध करोआई जा'रदी ऐ। इस मकसद कन्नै बनिहाल दे टीएसओ नजीर अहमद वानी होरें टीएसओ दफतर च इक विशेष कैंप दा आयोजन कीता। मती गिनतरी च लाभार्थी अक्खें दे सकैन दे माध्यम राएं ई-केवाईसी करवाने लेई रींगें च खड़ोते दे हे, जेह्ड़े अपने अंगूठे ते उंगलिं राएं बायोमैट्रिक नेई करी सके हे। एह गेड़ सार्वजनिक बदलाह राशन दी बंड च पारदर्शता आहनने लेई खद्य मैहकमे आस्सेआ पुट्टी गोई ऐ। खाद्य मैहकमें गी हिदायतां जारी कीतियां गेइयां जे ओह पूरे जम्मू कश्मीर च राशन उपभोक्ताएं लेई ई-केवाईसी लागू करन ते हुन मैहकमे नै उपभोक्ताएं गी सहूलतां उपलब्ध करोआने लेई अक्खीं गी स्कैन दा विकल्प बी शुरु करी दित्ता ऐ। इक अधिकारी नै दस्सेआ ऐ जे ई-केवाईसी दी पैहलकदमी राएं फर्जी बनाए गोदे राशन कार्ड गी खत्म करना ऐ। नजीर अहमद वानी होरें दस्सेआ ऐ जे बड़डे अधिकारिं आस्सेआ सख्ती कन्ने दित्ते गोदे दिशा-निर्देशें दे मगरा अस सब्बने लाभार्थिं दा ई-केवाईसी करा'रदे आं तां जे जिंदे कश राशन कार्ड हैन उंदे च बगैर कुसै परेशानी दे राशन दी बंड गी जकीनी बनाया जाई सकै।

<><><><><><>

## Samba Agriculture

सांबा जिले दे करसानें बड़े मते खुश न की जे धान दी फसल लाने लेई बीह् उनेंगी रामगढ़ दे राई-बाई विभाग दे दफतर थमां उपलब्ध होआ'रदा ऐ। एह्दे तैह्त अज्ज राई-बाई मैहकमे दे जिला अधिकारी गोपाल सिंह होरें राई-बाई मैहकमे दी टीम कन्नै रलियै रामगढ़ च करसानें कन्नै इक बैठक कीती। जेह्दे च उनेंगी राई-बाई कन्नै जुड़ी दी नमीं तकनीकें बारे जानकारी दित्ती ते कन्नै गै करसानें गी धान दी फसल लाने लेई 370 रपें फही किलो आला बासमती बीह् अद्धी कीमतें पर बंडेआ। एह बासमती बीह् करसानें दी पैहली पसिंद ऐ जेह्ड़ी सदियै थमां चलदी आवा'रदी ऐ। एह्दे अलावा मैहकमे आस्सेआ करसानें गी भिंडिं दा बीह् बी मुफ्त बंडेआ गेआ।

<><><><><><>

## **Kala Kendra**

जम्मू दी कला केन्द्र सोसायटी नै अज्ज जम्मू कश्मीर दी समृद्ध विरासत गी दर्शाने लेई 7 रोजा फोटो एक्जीविशन दा उद्घाटन कीता। एहदा आयोजन जम्मू दे कला केन्द्र च कीता जा'रदा ऐ। इस प्रदर्शनी दा मकसद फोटोग्राफें दे राएं इस खेत्तर दे सांस्कृतिक ते ऐतिहासक महत्व गी बढ़ावा देना ऐ। इस मौके पर संस्कृति ते जनजातीय मामले सरबंधी मुख्ख सचिव सुरेश कुमार गुप्ता होर मुख्ख परौहने हे, जिनें इस मौके दी शोभा बधाई। इस प्रदर्शनी च इतिहासकार, फोटोग्राफर ते संस्कृति सनें बक्ख-बक्ख दर्शकें गी आकर्शित करने दी मेद ऐ। जेहदे नै उनेंगी जम्मू कश्मीर दी विरासत गी पंछानने दा मौका थहोग।

<><><><><><>

## **Kathua-Ayush**

आयुष जम्मू कश्मीर निदेशालय आस्सेआ 10में अंतर्राष्ट्रीय योग दिवस शा पैहले अज्ज सरकारी डिग्री कालेज कठुआ च इक बड्डे योग कैंप दा आयोजन कीता गेआ। इस बारी अंतर्राष्ट्रीय योग दिवस दा विशे-सार ऐ-“महिला सशक्तिकरण” अज्जै आले योग सत्र च सरकारी डिग्री कालेज कठुआ दे मते हारे विद्यार्थिएं हिस्सा लैता। एह योग कैंप डॉ. ज्योति शर्मा ते डॉ. रेखा शर्मा हुंदी अगुवाई च लग्गा, जिनें महिला सशक्तिकरण ते योग दी भूमका बारे अपने बचार बी रखे।

<><><><><><>